

Presbyterian Church in India (Reformed)

# MESSENGER

Vol. 41 No. 02

February 2025



**02** Sunday School kipat Ni    **03** PCI Village School kipat Ni  
**09** Zomi National Day of Prayer    **20** Zomi Nam Ni

Kum thupi  
Tawp lou in thum un



Feb. thupi  
Gam leh nam a dia thumna

Editor :  
Rev. Dr. Khen P. Tombing

**PRODUCTION TEAM**

**Editor**

Rev. Dr. Khen P. Tombing  
C/No. 9862088190

**Jt. Editor**

Rev. Dr. G. Pau Muanthang  
C/No. 7085645785

**Contributing Editors**

Elder S Khamminthang  
Pastor M Khamlianmang

**Cir. manager**

Elder C. Biaklun

*Gam leh Nam adia Thumna : 01*

*Taup lou in Thum un : 04*

*Taup lou in Thum un (2) : 08*

*Donald Trump Tanchin : 10*

*Christian Etiquette : 15*

*Na Lingchiang hun Pathian pia in : 22*

*Ui Vangpha : 26*

*ReST Studentte : 28*

*Thumna Pitu : 30*

---

*A sung a* **THU KISUAHTE**  
**EDITORIAL BOARD**  
*ngaihnan ahivek tuan kei*

---

*Printed, published and edited by*  
*Rev. Khen P. Tombing*  
*at Thawmsons Color Press*  
*for the Presbyterian Church in India*  
*(Reformed)*

Editorial 

# GAM LEH NAM ADIA THUMNA

Rev. Dr. G Pau Muanthang, Principal, ReST

Kum Thak 2025 zang ding in ka innkuan un Aizawl apan Delhi zuan in December 27, 2024 in Indigo lenna 6E – 5364 in nitaklam dak 1:20pm in Lengpui nosia in ka lengkhia uhi. Lenna sung a Indigo-te khateng tanchinbu **Hello 6E** ka sim hi (*Indigo ahihleh lenna 393 nei in India gamsung leh India polam ah leng service nei hi. Niteng in lennaphual 123 kawmtuah in a lenna uh 2,200 vei lengkhia in International leh domestic ah khualzin mite potuah uhi*). Huaia kha tengtanchinbu in Indigo lenna a paina gam tuamtuanmte uh khovel pumpi map toh taklang uhi.

Huai khovel gamlim ka et kawm in, Manipur gam neuchik kilometer kimkot 22,327km sung a gam leh leitang kituh a i buaina uh ka ngaihtuahna ah honglut hi. Khovel gam a let-let maizen toh ei hiai gam neuchik khat sung kituh a kihichi buai chi'n ka ngaihtuahna hon sukha mahmah hi. Khovel ah gam lianpipi mihing in aluah louh a tamtam maizen toh ka chi hi. China bang i et leh a tenna uh sehli suah sehkhat suahlam pang zul teng a tengsuk uh, huchimah bang a

Russia gam i et nawn leh a tumlam gam tengteng uh a awng chih theih phial in om a, suahlam ah tengkhawm deuh tangpi nawn uhi. Huchimah bang a Canada i et nawn chiang a America toh kigamgitna bul leh suahlam deuh ah teng ua, a gamte uh sehli suah seh thumte bang awng phial a om gam hinawn leuleu hi. Manipur gam neuchik sung kituh a kigawi eekte hehpih huai ka kisa mahmah hi. Toupa khovel a gam-awng atamtam toh kou minam leltakte

tatna ding leh khosakna ding zaw nang adia haksa hetlou di hi a maw, “*Toupa gam hong pia in nang a di'n ka hoih ding uh*” ka chi kha zozen hi.

Awle, Unau eite tenna ding leh khosakna ding gam ah Pathian a lunglut in hon ngaihsak diam? Pathian Gam leh Nam ah a lunglut hia? Chi'n kidong le i dawnna a kibang vek kei ding hi. Khenkhat in: Khemkhem huai khawng ‘**Sa vai**’ law ngal. Pathian’ lunglutna ‘**Khalam thilte**’ ahi a, leilam thilte leh Sa thilte toh kisai ei gingtute mahmah leng kihellou dia hon deih ahi chi pawl leng i om thei hi. Hiai dawnna tuh a dikna a om a, Lai Siangthou toh a kituahna leng a om hi. Khenkhat in lah mawkmawk, Pathian Gam leh Nam vai ah lunglut tham e, Lai Siangthou enle hang: Mosi, Joshua, Gideon, Samon, Solomon, David i chihte Gam le Nam a ding, a chipihte uh humbitna dia galdou ngen a ve uale. Pathian Gam leh Nam a lunglut kei leh Lai Siangthou ah hiaite tengteng om mawk lou ding ahi, i chi thei ding hi. Hiai leng a

dik mahmah Lai Siangthou toh kituak ahi nawn hi.

Huai bang ahihziak in, Pathian lunglutna bang hia, a lunglut louhna bang a hia chih i theihchet poimoh mahmah hi. Hiaite gel i bukkak siam kei a kibanglou vilvel (*mutually exclusive*) i chihleh, huai leng Lai Siangthou hon sinsak dan hilou zel ahi. Adik pen leh Lai Siangthou hon sinsak dan toh kituak ahihleh Pathian in Lai Siangthou a agenna hun leh munte leh amite toh kisai hoih tak a i theihchet chiang in i gensak dan leng hong dik ding hi (2Kro.7:14). A huchihkeileh bel Pathian Gam le Nam a lunglut lou hiam ahikheileh, Pathian Gam le Nam a lunglut lua hiam va chih khak theih hi.

Lai Siangthou a i et chiang in Gam leh Nam a Pathian lunglut mah ahi chih kichiantak in i mu thei hi. Pathian Gam leh Nam a lunglut ahi a, huaiziak in gam sung a teng ding mite leh a gamgite uh leng a khun sak chih Lai Siangthou ah i mu hi (Nas. 17:26-27). Thukhun Lui a etsak nei in Gam le Nam zang in

Pathian in a mite a na pi hi. Huai tuh, ‘*a tangtawn gam*’ ding leh amah adia ‘*nam siangthou*’ hi ding in ana chiltou nilouh hi (1Pet. 2:9). Himahleh, huai *tangtawn gam* leh *nam siangthou* a taka a tan ma un leng khovel gam taktak ah a pilut in a luahsak hi (Jos. 5:12). Huai kia hilou in, huai gam a khosa a kikhual a kemit ding in leng a deih hi (Gen. 2:15; Sam 24:1; 50:10-11; 1Kor. 10:26). Huai teng ban ah, huai Gam le Nam tung a thunei leh vaihawmte ah leng a lunglut a, vaihawmte tung ding in, a hoih loute a kaikhia hi (Dan. 2:21-22). Huaibanah poimoh mahmah thunei leh vaihawmte a dia thumsak ding in Lai Siangthou in a hon sinsak lai hi (Rom. 13:1; 1Tim. 2:2). Huaiziak in, unaute tukha in Gam le Nam leh heutu leh vaihawm i neihte uh a ding in i thum ding uh. Thumna thilhihtheihna in amaute lawng in vaihawmtu hoih leh lohching a hong suak thei uhi.



### UPA TEELNA THUMNA AH PHAWK IN

Presbytery tuamtuam ah tu February kha in Upa (Elder & Deacon) kitelna om ding hi. Hiai kitelna ah Saptuam adia gahsua thei ding mi, Toupa’ deih bang mite i tel khiak theih na ding un telsaktu ding leh tel a om ding upa khempeuh a ding in thum ni.

### PILLANGKATTA PC KUM 3 CHINNA

February 22-23, 2025 sung Guwahati a om Pilangkata PC kum thum chinna lopna leh Seminar om ding hi. Hiai hun ah thugentu leh Seminar la ding in Rev. Dr. G. Pau Muanthang, Principal, ReST, Nu Chiinhoikim leh Head Office apan heutu khenkhat Feb. 19 a zin khia in Feb. 24 in hong kik ding uhi. Amaute’n program lohching tak a a zatna ding in thumna ah phawk zui ni.

# TAWP LOU IN THUM UN

(I Thessalonika 5:16-18)

Chibai, Nang naakpitak a deih tuam, PCIR Messenger February kha sim kha ding a, Pathian sehtuam leh Jesu Christ' tatna sang ding a Kha' sehsiang, Pa Pathian' theihkhoh bang a, a teel mite kiang ah; Hehpihna, Lemna leh Khamuanna hihkhan in om hen.

**Thupatna:** Michih in haksatna i sak mahmahte uh lak a, khat Kipathugenna neih ahi chi leng kigen khial lawmlawm lou ding hi. Kipathu gen ding ahilhai a, kipathu genna ding san, leng theilou a hun zang liam zungzunge i hi uhi. Tuabang ahilhai in, i tangtelna mun in Gingtute'n i hinkhua ua, i sepsuah ngei ngei ding uh thil thum a hon gen hi. Nuam gige un, Tawplou in thum un, angkim ah kipathu gen gige un, a chi hi. Huai bel Pathian in Gingtute hinkhua a, hon i om dingdan ua a deih dan ahi hi. Hiai thuvual thumte, ngaihtuah detdet kawm in, saulou kha-kha in suutkhawm leng ka chi hi.

**Nuam Gige Un (Kipak gige un):** Damsungkhosakna hiai leitung a, haksatna hiai zah i tuah lai ua, kipaak gige thei ding ka hi diam? chih mitampite dotna masa hi ding in ka gingta hi. Thessalonika saptuamte leng sawina nasatak tuak ahiman in, Kipak gige a om ding uh haksa mahmah ding in ka um hi. Himahleh, Sawltak Paul bangkim ah kipahna thuguk ka theita (Phil 4:13) ana chi hi. Ahihleh Paul in hiai a kipahna thuguk ka theita, a chih bang hi peuhmah ding hiam? Chih dotna poimoh tak ahi. Paul in hiai a kipahna thuguk a chih tawmchik a dawnna pe ding hi leng, tua i tung a thil tungte ziak a, kipahna hilou in, Pathian a ki-ngakna in kipahna

hon tun ahi zaw ana chi hi. Huaiziak in, i kipahna ding tuh, “Leimi a piang, Van mite hi ding a, i min uh gelh a aom ziaak a kipaak leh Ginglou mite bang a, Lametna neiloute hilou a, Lametna kipah huai neite i hihman ua, lungkhamna ding omlou a, Kipak gige ding i hi zaw uh (Rom 12:12; Luka 10:20) ana chi hi.

Huan, Toupa toh tonkhawm gige te a ding in chiklaipeuh in a Nuam gige in, kipaak tak in leng om gige thei uhi. Bangziak hiam i chihleh, Toupa toh i om khawm Chiang in, i ngaihtuahnate siang in, i pianthakna in hon kipaak sak a, tua in kipahna thuguk hon neisak gige hi. Himahleh, hiai bang kipahna nei mite’ n a hinkhua ua haksatna leh buaina tuaklou ahi zenzen kei ua; hiai a haksatna leh buainate uh tungtawn in lametna leh kipahna, i TOUPA apan hong pai gige ahildan thei ua, tua in amaute hinkhua ah kipahna om sak gige ahi zaw hi.

Mihingte’ n i hinkhua ah haksatna leh mangbatna i tuak lallel a, i tuak

toutou lai ding uhi. Himahleh, hiai bang lungkhamna leh mangbatna i buah hunte in sawltak Paul in Korinthte kiang a, a laikhakna ah, hiai bang in ana chi hi. *“Huaiziak in ka lungke kei ua, ka salam mihing pen uh zaw zawngkhal hiai-hiai mahleh; ka khalam mihing pen uh bel niteng in bawl thak in a-om zel hi. Ka gimthuakna neukha uh, tu mitphiatkal sung kia om ding in, thupina thupitak khantawn a ding in a hon bawl sak hulhul ahi; Thil muhttheihthe enlou in, thil muhttheihlouhte ka en zo ngal ua; thilmuhttheihthe zaw sawtlou kal a ding ahi a, thilmuhttheihlouhte bel khantawn a ding ahi ngal a”* (II Korinth-te 4:16-18) ana chi hi.

#### **Tawplou In Thum un:**

Thumna poimoh dan theilou i om ding uh a gintakhuai kei hi. Ginglou mi chi a, i theihthe na-ngawn in leng, amau pathian chiat kiang ah, diktat leh chitaktak a, a thum dan uh i mu chiat ka gingta hi. Tua in Ei gingtute a di’ n thum a poimoh dan hon muchian sak semsem hi.

Huaiziak in tawplou a i thum theihna ding un, lungtang a kipahna Pathian in hon pia hi. Tua kipahna nei mite kia in, Tawplou in Pathian kiang ah thumna nei thei uhi.

Thum i chih chiang in, mitsisa sese a, thum ding hiam, thumna mual va naih a thum hiam, ei vuak a thum hiam, mun sehtuam khat a thumna va neih chih pen chidan ahikei a, thumna i chih Pathian toh kihouna ahi zaw hi. Huaiziak in, thumna i chih koi munpeuh ah om leng zong lungsim in i thum thei gige uhi. Thumna neih tam in Pathian ompihna leh Pathian i neihna hon langsak zaw hi.

Toupa'n tawplou a thum dia, hon thu piak bang in, i thum tam zoh khop leh Ei ah kipahna, lungmuanna, leh Khamuanna kinei tam hi. Thum ngeilou in zaw, Toupa ompihna leh a phawk kei chihna ahi. Himahleh, TOUPA'nei mite'n zaw thumna hun teng in, koimun peuh ah, kipahthu genna ding, TOUPA hoihna, thupina a muhte uh tungtawn leh a thiltuahte uh ziak in, Tawplou in thumna nei theigige uhi.

### **Bangkim ah Kipahthugen ding:**

Mihingte'n i hinkhua ah, bangkim tung ah kipahthu genna i nei zou kei ding a, himahleh bangkim ah kipahthu gen ding ahi. Gingtute Khalam dinmun tehma hoih pen tantawk a lungkimtak a, Pathian kiang a kipahthu gen ahi. Sam gelhtu in "*Ka damsung teng in TOUPA ka phat ding a, ka hin lai teng in, ka Pathian phat in la ka sa ding*" (Sam 146:2) ana chi hi. Huaiziak in, Khalam chidamna i neih theih na ding in, Pathian kiang a kipahthu gengen ding ahi zaw hi.

Bangkim a kipahthu i gen theihna ding in, Bangkim TOUPA tung a, I ngak zoh a, Amah a muannaleng i neih leng poimoh mahmah hi. Amah a i hihna bangbang toh i kipiak khiak ngam chiang in, bangkim i tung a, hong tung bangbang ah kipahthu i gen thei pan ding uhi. Pathian a kipiak-khiakna kim omlou in, Pathian kiang a kipahthu genna ding i nei tawm ua, kipahna ding leng i nei kei uhi. Himahleh, Pathian kiang a, bangkim i piakkhiak chiang in,



a nuam leh haksa i tuah hun in leng, Pathian deihdan ahi chi in, kipahtu I gen thei gige ding uhi. Tuabang a, i om theihna ding in TOUPA toh ton a, AMAH a ki hihhat a, Christ a Pathian deihlam ahihziak a hih ngei-ngei ding ahi.

**Thukhitna:** Haksatna leh mangbatna tuak lou i om kei ding uhi. Himahleh, “*Pathian in a itte, Aman a seh bang a, a sapte a*

*di'n, a hoihna ding un, thil bangkim a sepsak chiat chih i thei uhi*” (Romte 8:28) a chih bang in, Toupa'n ei a dia ahihte, a hon sehsakte, i muhchet chiang in, kipak gige, tawplou a thum leh bangkim a, kipahtu genna ding nei in i om ngei-ngei ding uhi. Tuabang a, kipak gige, tawplou a thum leh bangkim a kipahtu gen-thei ding in, simtute TOUPA'N hon vualzawlchiatta hen.

Dated: pastor tkshyamvalte  
 15122024[valteshyam@gmail.com](mailto:valteshyam@gmail.com)

## KHUALZIN UH

Rev. Dr. Khen P Tombing leh a zi Mrs. Rith Tombing-te January 29, 2025 in Delhi lam zuan in zinkhia uhi. Amaute'n US Visa interview nei ding uhi. US a i saptuam thumna leh sum-le-pai a hon panpih, a bitak a Covenant Children's Home a naupangte support tute tung a kipahtu genna leh support beh ding zonna nei dia US zin sawm ahi uhi. Visa a nga na ding un thumpihni.

# Tawp lou in Thum un

- Nu Sialvung, Rayburn PC

Awle, Khrist a ka inkuante, Khrist a ka unaute, amasa in kum 2024 gal leh sa lak a hon kem, hon ching a kum 2025 hon kaipih, hon kem, hon ching i biak Pathian tung ah kipahtu ka gen a, simtute tengteng itna chibai ka hon buk masa hi.

Awle tu kum i thupi ding ua i heutate'n tawplou in thum un chih hon tel uh hoih kasa hi. Tawplou a i thum theih na ding in Amah toh kizopna kitak i neih masak a poimoh pen ahi. Johan 15:h ah, nou kei a na om gige ua, ka thu len gnnou mau a aom gige leh na ut peuh uh ngen un nou adia hih in a om zel ding achi hi. Pathian toh kizapna tuh Pathuan thu bang zel a om ding a Pathian thumanna ahi. Ei singtang mite lak a thumna i zat dan uh tuh ka muh dan in Pathian toh kizapna diktak nei lou pi in a thupiakte lah zuilou, Bible lah sim ngei lou, i lungsim a lah Pathian thu om kha lou, i houlimna a le Pathian thu i kam a pat pawt ngeilou, zuau gengen mai, Pathian thu sang a khovel thu gengen mai.

Thu hoih deih lou, himahleh thumna poimoh ngaih mahmah, thum pibawl mahmah a ki om hi. Hichibang ching mite tuh Isai 59 in a dawng a, ana tai khin ahi. *“Toupa khut hondam theilou ding in tomsak in a om kei a, abil leng zalou ding in a ngong sam kei hi. Na thulim lounate un Pathian toh na kal uh hondal ahizaw. Bil a a zaknop louhna*

*ding in na khelhnate un amai a liah a, na khutte uh lah sisan a hihnit in a om a, na lei un zuauthu a gen a, na mukte un thuginalou gen in a phun nua-nua hi”*

Pathian toh kizomloup i a thumna ahileh i khelhna in Pathian mai meipi bang in a liah a, mi lepchiahte thumna Pathian in a dawng nuam kei hi.

I Thess. 5:17 ah “*Tawplou in thum inla bangkim ah kipahtu gen gige un huai tuh Pathian deih lam ahingal a*” achi hi.

lou a thumna i zang thei ta ding a, bangkim ah phunphun lou in i tan bangbang Pathian kiang kipahtu i gen theita ding hi, huai tuh Pathian deiham ahi.

Unaute aw thumna i chih zaw Pathian toh kizopna hoihtak nei a a kahiangte i hih chiang in tawp

Simtute Pathian toh kizopna hoihtak nei ding Pathian in hon vualzawl chiat hen aw.

## TALLIAN PC HOTDAMNA CHIALPI

Tallian PC leh Bialtu Pastor malakna in Jan. 24-26, 2025 sung Tallian ah camp neih ahi. Sun hunte ah Htp Lunmang Guite in naupangte thu leh la in kithuahpih a hun nuamtak in zang uh. Thumna te ziak in camp



lohchingtak a zoh ahi. Toupa min phat in om hen. Thumpihte tung ah kipahtu kon gen hi. Hinkho thak zang dia kipe thakte leng thumpih zom zelni uh aw.

- Rev G. Suanzalam  
Coordinator (Min.)

# DONALD TRUMP

Donald J. Trump tuh June 14, 1946 in New York Khopi ah piang hi. Donald Trump' pa ahihleh German mi Federick Christ Trump ahi a, America a apemlut nung in a sumdawna Real Estate lam lohchin pih mahmah khat ahi. A khuak hoih in, thil khatpeuh ah a lohchin masiah bei ek mi ahih dungzui in a tapa Donald J. Trump kiang ah "*Gim tak in nna sem inla, lungke ngei ken la, na lohchin masiah beidong ngei ken*" chi in thuhilh sek hi.

A pa hauhsakna zar zou in Donald J. Trump hong khangtoug a, a pianna pa mah bang in lungtang khauh leh mi fel mahmah hong suak a, a valnou lai in alawmte hi in, a pianpih sanggam hitaleh dawm khollou in zial suk mai sek hi. Huaiziak in a pa'n Military School khat ah a valnou sungteng kai sak hi. Sepaih School ahih dungzui in a kietkolna uh leng khauh mahmah mahleh mihausa tapa lungtang khauh Donald J. Trump in thuakzou mai sek hi.

A graduate zoh in sport lam ah bangtan hiam kiheltou in captain hihna dinmun len thei ding khop in

a siam hi. Hausa, melse lou khat ahiehtoh numei lam ah che simpikhat ahi a, himahleh tu khonung a agen chiang in a nidanglai hinkhua-te tu hun a kidektheihna a neih na ding leh politics huang a pilvanna petu hohtak ahi chi in gen hi. Pennsylvania a Bussiness School khat a kum 2 a kai zoh in a Pa' sumdawna panpih in semtou pah a, himahleh project tuamtuum a neihte uh punna om manglou ahihman in haksatna tuaktou pah hi. Hiai hun haksa tuh thil khatpeuh a kuhkal a ngaih dan a zilkhiak masakna pen ahi chi in Donald Trump in gen hi.

Hiai haksatna kum 3 a paltouh nung in a pa' company ah President dinmun hon lentou a, a sumdawna uh a lohchin di dan ngaihtuah in buai petmah sek hi. A company min uh lui lawta pen thak suak sak ding poimoh sa in, "*The Trump Organisation*" a vuah toh kiton in New York khopi sung, veng thupi pen ah a office uh leng suanlut ngal hi.

Hiai hunlai in Donald Trump tuh numei minthangte toh kizui mun lua ahihman in "*Numei mi*" chia theih in om mahleh amah khuak hoih man, a organisation uh suk minthanna dia a lemigel khat ana hi dimdiam ahihman in a sumdawna ah sangtak in vawk kaitou daih hi. Mi tampite kilat phak louna The New York Times magazine khawng ah hong kilangtou mahleh a kilatdan pen Mivomte Simmohna lam ahih daih ziaik in case lianpi khat suak hi. Hiai bang case pen America gam ah lian mahmah ahihman in mi tampi'n court a kilang se lou ding in sum a kitan in a case maisak sek mahleuh Trump in bel kuahiamte guai se lou in bei kik hmiah lel ahihman in Department of Justice-

te toh court case lut lou ding in kilemna bawl uhi.

Donald Trump khosak dan nuhsan a gensia News khenkhatte'n 80's laihawl akipan gense ngam nawn lou in a hauhsak dante hon suah panta ua, Donald Trump tuh mihausa leh milar a hong suak der ta hi. Donald Trump mak na mahmah khat ahihleh koi peuh ah hoh in, bang lam peuh ah houlim ngai taleh kiginkholh luat ngai lou in gensiam in houlim thei vek mai ahihman in midangte thazoh theihna tak khat nei hi. New York khopi a Casino (Mihausate sum a kimawl na munpi) a honkhiak leh huai in a summuhna behlap tuan mahmah hi a theih ahi.

A minthang sousan laitak in a ngaihtuahna ah America President 40-na Ronald Reagan leng politician hihetloup i a America President kai thei ahihleh kei bussiness man leng huai bang hi thei ding ka hi chih ngaihtuahna nei in politics lam ah awl-awl hong kiheltou hi. Hiai hunlai pek akipan America a ngaih poimoh dan ana

genta a, America in gam tamtak panpih mahleh a panpih gam khenkhatte'n kipahna dan thei lou a sakdante ana gen hi. US Foreign Policy deihkhop huai asak louh dan agen sek banah awlmoh taktak ahinna kilatna ding in US Dollar tampi foreign policy a ding in pekhia hi. Politics toh kisai a ngaihdan gen zel mahleh amah sumdawngmi ahiah ziyak in ngaihven loh pah khollohi. Huaibang kal ah a company un lehkhah poimoh tak khat a leak sak khak ziyak un Donald Trump sumdawngna in siat lam nawt ahichih News lam te'n theikhia in hon puangkhaia ua, minsiat lam hon manoh hi.

Huchih lai in mi lungtang khauh Donald Trump in lungkiak nak sang in pan lak ding dan tupguh tak in hon ngaihtuah a, Casino a khahsuah pen hon leikik in, Miss Universe, Miss USA kitehnate ah sum thoh in amin thanna ding in nasep hon sunzom a, a minsiatna zah in a minthawngna hong sang zaw zeel hi. Hiaibang a atupguhna in mite muanna tun tou nak mahmah hi a theih ahi. 1999 veel in Politics lam ah lut leh bang dinmun ah a ding dia

chih ngaihdan alakkhawngna uah, seh 4 suah seh 3 in a vote lou ding chi ua, seh 1 te'n theichianlou chizawngmah ua, himahleh mi tupguh, lungsim lian a sak thu uh bel gensim chiat veve uhi. Hiai dan dinmun ah bel Donald Trump a ding in Politics a lut vual hikei leh kilawng hi.

Himahleh lungke hetlou in "Reformed Party" zom in Politics toh kisai a ngaihdante interview khenkhat ah hon puangtong mahleh a party sung ua kituahlohna khenkhat ziyak in President Candidate a tup pen zukkik phot in a mainawt zia hon khek thak hi. Kum 2004 in TV Show khat pankhia in a host tu ding in mi mangthang leh mite muan hon zangtong a, hiai ah lohchingtong mahmah uhi. A lohchin laitak in amaban etna leng kihawng ding in perfume "Trump" kichi bawlkhaia a, a lohchin pih nawn hi. Huaitakin ka minthanna in mailam nawt taktakna e chih chiantak a thei in politics ah maban hon sawntong nawn hi. A khuak a zat siam na mahmah khat ahiehleh mite ngaihsan mahmah Barack Obama toh kisai ah "*Kipatna mumal neilou*" chi

in hon soisel keuh a, US President hial a soisel ngam chiang in mite'n ngai thupi deuhdeuh uhi, huai pen Trump in a tup mah ahi hi. Hiai hunlai in America mipite'n Foreign Policy detdou leh mihausate khutzat maimai a omlou ding President hangsan poimoh mahmah ua, mipite thumna leng ahi hi. Huchibang a mipite dangtak laitak 2015 in term nawn a US President Candidate a ding di ahihdan Trump in hon puangkha, tamtak hamhah in, maksa pawl leh ching dia gingta hetlou toh a om lemlum uhi. Trump in bel mipite lamet theichian in nungkik lou in paisuak veve a, mi tampite gintak louh himahleh US President 45-na ding a telching in hong dom mai hi.

### **America Great Again**

Trump in a thupi ding a bangziak a “**America Great Again**” chi hiam? Thupina lam ah gen le hang tunitan in America sang a thupizaw mun dang om nai lou hi. Himahleh America tuh i gam politics toh dinmun kibang ah ding hi. Huaibel a dik leh tang a vaihawm ngamna hinawnlou, America Politician tam zaw-te Pathian theilou mihausa

taktak te'n a guk-a US Government a control uh, mi minthangte thuneihna, sum etlahna ziak a gamdang, a bik a China leh Russia-te khawng in aguk a a thuzoh uh politiciante tamna suak maimah hi.

Hiai leltak hilou in, America tuh Khrsitian kiakniamna gam ahi. School khenkhat ah Bible sim ding phal hi nawn lou a, kholai ah setan limtakkiak in oma, Biakin khenkhat Cinema Hall suahna mun ahi maimah hi. Numei leh Numei kitengte ki otsakna gam, pasal leh pasal kitengte zalenna gam, Numei pasal a kikhek (Trans Gender) munpi khat suak in Pathian theilou gam mah bang in government paizia keniam in, gamdangte'n huchitel in zahtak nawn lou uhi.

Americate chihtak louh dan kilang mahmah tuh Russia leh Ukraine kidouna ah Ukraine panpih in galvan a kallak in pe mah le uh atak a va doupih lou in lakloh tak in koih ua, tunitan kidouna paipai, a vualzou lah om theilou in om uhi. Huaibang mah in Israelte leng panpih gige mahle-uh Israel a chet dek taktak chiang a khamdaitu tuh America hizel

hi. Lakloh tak in mi panpih ua, lah vualzou ding taktak in mi koih lou uhi. A omzia bel gamdang a buai zoh peuh leh America thuneihna lian ding chih a gel ziaak ua, lakloh tak a mi panpih lel ahi uhi.

Hiai bang thulimlou America tuh Donald Trump in “*Ka tungding kik ding, America zahtak huaina ka hingsak thak d ing*” a chih Chiang a mipite lungsim zou petmah in huaiziak a Amercia khangthu adia vote tam mu a chiamteh tham in vualzou hi. Himahleh America politician niin taktak, setan vanzatte mihausa, hoih deihloute’n Donald Trump minsiatna ding a zong huan a, a beih huan Chiang un haksatna tampi thuak ahimanin mi hehpih huai tak leng a suak hi. Hiai mihausa, khovel a guk a controltu te’n khovel a news minthangte a thuneihkhum vek nawn zawkmah uh toh Donald Trump minsiatna ding ngen post in, kitelna-a a chin louh na ding thu suah in dou huan ek uhi. Himahleh Donald Trump tuh mi lungtang khauh ahi a, a bah kei a, kal a suan a, a dingtang a, a zou zel hi. Tutung Presidential

Speech a neihna ah “*America zahtak huai na ka tungding kik ding a, dan humbit in ka zahtak ding a, America a ding in nithupi a suak nawnta*” chih te a gen ban ah “*Khovel ah mihing chih nih lel a om, huai tuh numei leh pasal ahi*” chi hi. Huaibel mihing hihna kikheng (Pasal a piang, numei a kibawl thak)-te a mohpaihna ahi a, transgender-te sepaih leh sepna a piakte uh tawpsak ding ahihthu gen hi. Ahi, tulai khovel a thudik gup kichi vuallelhna bang mai hita! Thudik gum ngam taktak a om nawn louh lai in Donald Trump in thudik tak a gum a, a pai tang a, haksa mahleh a zou hi. Etton ding hinkhua ahon pia hi. Thudik tuh haksa mahleh Vualzou ahi.

Trump vualzohna tuh Khristiante vualzohna leng a chih theih hi. Aman “*Pathian in America tungding dia ahon deih ziaak a ka hinna hon hawi sak ahi*” chih tang litlet hi. Thumna toh delhzui ni. Eilawi na tan adia leng manpha kha ahi. Toupa’n Trump Vualzawl hen.



# CHRISTIAN ETIQUETTE

## (Gamtat kilawm)

- V. Nunlian

Romete 12:3-6 “*Ka kiang a Pathian’ hehpihna thilthawnpiak piak a om ziak in, na lak ua kuamah na kingaihsaang ding val ua kingaisaang lou a, Pathian in kichih kiang a ginna ahon piak toh kituak a, **pilvangtak a om zaw ding in** kon hilh ahi. Eite tengteng in i sapum khat uah sahiang tampi i nei ua, huai sahiangte’n nasep tuam chiat aneih bang un. Eite tampi himahlehang Khrist ah sapum khat ihi ua, **khat leh khat i kihiangtuah chiat uhi**”*

A tung a i taklat Laisiangthou, Romete 13:3-6 in dotna leh a dawnna ahon piak kichian mahmah khat a om a, huai tuh Bangziak a pilvangtak a om ding? chih leh dawnna ahon piak zui ngal tuh khat leh khat kihiangtuah chiat i hihman uh ahi chih ahi. Kihiangtuahna i hihna un bangziak a pilvan ngai hon chi hi hiam?

Blue Star a ka kai lai in nitaklam assembly na ah ka nunglam ua mi khat in ahon sawn ziak in ka vek un ka ma lam uah ka ban kikhin noih kha ua, ka teacher-te un kimawl hon sa in hon zep vek uhi. Mi khat ziak in ka vek un ka thuak kha uhi. Rayburn naupangte school kai a hong tawp Chiang un naupang tam mahmah ahihman un school naupangte chauh buai kha lou in lamlian a gari taite Lanva lei tanpha ah traffic a jam thei hi. Huaibang mah in veng khat a khamtheih hih khat a om ziak in a inkim leh khosung mite’n van a man khak ding lau in a kong uh kalh in, lungmuang lou in tampi om kholoh uhi.

Covid 19 in kihingte kihiangtuah i hih dan uh hon lak chiang diak hi. Kuahiam khat Covid Positive zia kin a inkim teng seal (pawt khe thei lou dia khak) in a om a, Covid matkhiak ahih nni a aphak khaknate, a sukkhakte tanpha sui in a om a, a tenna kho pumpi lauthawng in i om uhi. Ut in ut kei lehang mihingte tuh kihiangtuah lawtel i hi uh chih chiang mahmah hi. Khat dahna ah tampi dahna ahon tun a, khat kipahna in leng tampi kipahna hon tun hi.

I kiim, i kiang a mite kia toh kizom tuah lel kihilou in, mundang, gam tuam a omte na tan in kizopna ki nei tuah limlem vek hi. World Cup (Football) TV ah i en a, Ronaldo hiam, Messi hiam in a langlamte goal gei a hon hawl tenten, ei a entute ana kisang ek in i om ua, huchih lai tak a goal hon shoot mai tuh khenkhat i kikou vok ua, khenkhat lah i kitawm vonvon uhi. A om zia bel khovel gamlapi a omte toh leng banglam hiam a kizopna neite ihi uh chihna ahi. Russia leh Ukraine a hong kidou ua, amaute kidou

ziak in Biakin ah khovel tawp ding kuan a thil tung dingte genna in i zang nai-nai ua, a omzia bel mundang a thil tungte'n eite leng hon sukha ahi chihna a suak hi. America-te President kitelna kua peuh i ngaihven ua, Donald Trump kichi min a theilou i vang mahmah ding uhi. Huai omdan bel amau hon thei pha khol kei leu leng ei te'n ana ngaihven luat dan khat i neih leh bel mun gamlapi a thiltungte'n eite hon sukha ahihman in kizopna chikhat suak hi. Munkhat a thil tungte'n midangte banglam hiam a hetkha vek ahi chihna ahi.

### **Christian Pilvang :**

Thil asia apha tung khempeuh te'n kizopna ana nei kual limlem ahihman in i Bible in gingtute tuh i gamtat, khohei a pilvang ding, midangte na saktu, heh saktu, minse saktu a panglou ding leh khat leh khat kilamtou tuah ding in hon hasuan hi. Huaiziak in Christian Ethic (Gamtat Kilawm) khosak dan i siam uh, i zil uh poimoh petmah hi.

Nikum in ei saptuam mi m khat a inn ua ka va hoh leh a tate uh ana om ua, phone ah ana kimawl uhi. A nu leh pa ka kan leh hon ngaihsak het kei ua, hon za lou chidek lehang lah amau akihou thou zel uhi. Nihvei ka kan nung in leng ahon dawng tuan kei ua, a tawp in huai naupangte ka tai ek mai hi. Gingtu inkuan khat in i tate midangte ngaihsak ding ahihdan i ki thuhilh uh ngai lua hi. Khenkhat in a tate un midang a ngaihsak louh khawng uh changkanna a ngai i hi ding ua aw chih theih phial mi bangzah hiam ka theih a om hi. Huai ding hilaizang lou, changkanna himahmah lou, ei gingtute tuh omdan, tatdan kilawm a gamta dingte i hi ua, huai tuh changkanna kilawmtak hizaw hi.

**I tulai khovel in ahon sukkhak pilvan tuak khenkhat ka hon taklang ding :**

1. Whatsapp, Facbook leh IG khawng a bangmah ngaihtuah sau lou a limlak i forward-te khawng in kuahiam khat zahlakna, zumna, lungkhamna, mittui kaina a tun kha diam? Pawng paupau kha, i

paukhiakte ana sim kha, ana dai dinden khat a ding in natna a tun kha hiam?

2. Na lungkim louhna, nupa kal kinakna uh, inkuan kinakna khawng uh na status sek hiam? Na status mu kha teng kiang a na kinak lam uh hilh hilel na hi chih na ngaihtuah kha ngei hiam? I thuaknate i status Chiang a kuahiam khat leh nih in zaw hon thuakpih, hon panpih dan hon gen mai thei uhi. Himahleh a thei lou dia kilawm mi tam zawte kiang na lungkim louhna pulak gige suak na hi. Na lungkim louhna na status mun leh midangte'n lungkimlou mun nu hiam, pa hiam chia hon thei uh hilel zaw hi.

3. Na dai kaih dan in na invengte a na sak hiam? Na singsuante'n na inkimte a dep lua hiam? Na inn lam in na invengte lungtang a nasak kha hiam? Na gari koih na mun midang a ding in a dongkholh lua hiam? Lampi se lakpi a gari na hat tai luat ziakin khe paite a ding in haksatna a tun kha hiam? Na gari in hawktui a gawikhak in

midangte a theh kha hiam? Na gari gindan a ngaih lua hiam? Na gari taidan, na dai kaihdan a khristian hiam?

Kihiangtuah vek, khat leh khat ki poimoh tuah, thil tung khatpeuh in midangte sukha vek ahihmanin i bible in pilvang tak a gamta ding in hon deih hi. I gamtat a Khristian hiam?

**Ki poimoh tuah mihingte :**

Mualkoi khua a ka teenlut kum un Inn ana tam lawtel kei a, gamlak a tam zaw ahi. Ana tengsate'n inn a om louhna deuhthe khawng lauhuai a sak dan uleh, bangbang hiam musek uh ahihdan uh a gen ziakun kou a tenglut thakte'n leng mi om louhna deuh na munte ka lau sim mai uhi. Tuni chiang in inn a ki mat suak in a om a, lauhna ding mun a om nawn kei hi. Aomzia bel niteng a kihou hilou, ka kinaihipih le hikhol kei mahleh ka khua ua midang ahong teen lut zelte un khamuanna hon tun ana hi ahi. Ka ngaihtuah phak hetlou mite leng kei adia ana poimoh kha uh chihna a suak hi.

Inn hong tam hiai-hiai a, nidang a Chi ser khat lei dia gamlapi va pai ngaisek pen, mi ahong tam takin inn gei chin ah dawr ahon bawl ua, ka chi leina ding uh naichik ah a omta hi. Ka inn gei ua dawr bawlpa tuh ka theih louh kal in kei adia poimoh kha a suak hi.

Ahi, zan a na lup chiang in na inn gei ua midang om ahi chih ngaihtuah kha khol kei lechin le na theihsa ahihziak a lungmuang na hi. Midangte'n "A nalh eee" ahon chihpih ziak ua na kicheina in man nei hilel ahi. Midang hon mu ding om lou hileh na kicheina in man neilou ding ahi. Siat ni phat ni a na veng leh paamte ahong paikhawm khiu-kheu ziak ua na kha muang tuan ahi. Na kahna hon kah pih ding a om ziak a na lungkhamna zaang tuan deuh ahi. Nang chauh in kah sawm lechin sawt kap zou hetlou ding na hi. Midang om hetlou hileh kua hiam ahon gensetu ding bek poimoh ding na hi. Mi tampi toh i omkhawm ziak a khatveivei kihisak kha dek i hi lel uh. Midang omlou hileh nang kia a khosuak zou hetlou ding na hi.

Midang hat in midang poimoh a, a hausa khat in nagum sem dia kiloh tawmte poimoh a, kiloh tawmte'n a sum muh na ding in mihausa poimoh hi. Nasem ding omlou hileh na hauhsakna in omzia nei lou ding a, nang mah in nasep ngai ding hi. Huaiziak ahi kisimmoh tuam omlou in, khat leh khat kihiangtuahte i hih ziakun pilvang tak in, midangte nat khak ding veng tak in om un chia bible in ahon sinsak! Midangte ngaihsak, midang khasiatna ding sukkhak ding kiven petmah ding ahi. ***“Unau ki itna in ki lainat tuah chiat un, noumau sang in khat leh khat kipahtawi tuah zaw un”*** Rome 12:10.

Ei lawi in i kum thupi ding un a bible tang sese bang taklat ding thupi sa hileng a kilawm a, i unau Mizo ten 2023 kum a KTP kum thupi tuh “Na sang a lian zawte zahtak in” chih ahi. Khristian diktakte'n midangte poimohna mu chian uh ahi. Huai bang in “Midangte ngai poimoh in” chih khawng kum thupi ding in nei lehang khan vai mahmah kha ding

hi. A thumal chet bible ah kimu kei mahleh bible hon sinsaknop tak tuh midangte ngaih poimohna hiveve hi. “Social Media a pau tam louh kum” chih khawng bang thupi in nei thei lehang i khotang le chidam zaw kha ding hi.

### **Pupa' sulnung :**

Tulai khangthakte i ki ngaisang ua, midang poimoh i sa khol kei ua, ei mah a hithei tawk kisakna toh i om lenlan mawk uhi. Tehdan tuamtuam zaw a om na dia, himahleh pupa' sulnung, a respect huai ngoih-ngoihna uh khenkhat ka hon taklang ding.

Pathian in Israelte kiang ah Khanglui mite gamtat, khosak dan leh a biak uh Pathiante thei thak zel a, khangluite mizia enkik zel dingin thuhilhna a bawl a, Mosi kiang ah la gelh ding in a sawl hi (Diu 31:19). A ban bung 32 ah Mosi lagelh a om hi. Hiai la gelh dia Pathia in Mosi a sawl na zia ah leh leh khangthakte'n Pathian kua hi a, Pathian bangchituk a muan huai hi hiam chihleh Aigupta akipan pikhetu Toupa a theih ding uh a

deihna ziak ahi. Pathian pupa-te sulnungte thei kik zel ding in khangthakte a hon deih hi.

I pupa te'n gamlak a ann anak Chiang un a gaih valte uh pawng paih mai lou in tuun hoih ua, "Kua hiam khat gilkiel a om kha dia, huaite a ding in a phatuam kha ding" chi in lampi gei ah koih hoih uhi. Gilkiel a om chih le hinailou hi, om kha ding chih lel zia kin ann gaih val a koih hoih uhi. Huai in midangte a ngaih poimohna uh langsak mahmah hi. Inn siate nitha tel lou in athawn in lam pih ua, lou zouloute khohpih in, damloute giahpih ua, misite suun pih in paikhawm ua, tunitan in hiai si suunna i paitouhpih lai hi.

Kua hiam in "*Buh khamkhop na ngah diam?*" chia a dot Chiang un "*Zu leh va in zah a ngaih a, damtak a lou a kikhoh theih leh khamkhop a om zou diam ah maw*" chi dondon uhi. Tomchik a "*khamkhop ngah di*" chih suk mai theih ahi. Himahleh upate'n hiai ana gen uhi. "*Khamkhop ngah e*" a chih khiak pah louh zia kin uh

ahihleh midang kua hiam khamkhop khou zouloute'n ka kampau aza kha ding ua, ahon eng kha ding ua, midangte lungtang ka suna kha ding chi in kiveng tak in midangte dawng sek uh chi uhi. Pupate kampau omzia i theih thak leh nak zahtak (respect) huai na lawmlawm uh e maw! I pupa ten tulai a tuailai ut dandan a pau phuat-phuat, changkang kisa mahmahte hon mu leu hai ahon nak sak tel ding uh e aw!

Midangte a respect siam dan uh tangthu ngaihnuam tak khat, atak a thiltung om hi. Nidanglai in Ngaihsi kichi khat Sakei in pet in gamlak lam ah tuah hi. Tangval hon a thei masate'n delh zui pah uhi. Huchih lai in pasalpha Khuangchera in leng a theih tak in delh pah a, amah tuh mi hat leh hangsan mahmah ahihmanin midangte delh pelh hi. A tai pelhte kiang ah "*Kei ka hat a, sakei ka that zou zaw ding ka chih zia kin a hon tai pel hilou ka hi aw*" chi in kamdamtak in gen chi uhi. Hiaipa tulai in hong hingthak leh pakkhi tampi ohsak ut huai ka sa.

Midangte ngai poimoh, respect  
siam, a hatna suang lou tak in  
om hi.

I pupate gamtat dan in midangte  
ngaihsakna leh zahtakna pia hi.  
Khristian i suahma ua huai paidan  
ana zuih uh ahita hi. Tulai khristian

kichangkang sakte sang a nakpi a  
respect huai zaw hinkhua ana nei  
uhi. Khristian i hihna uah, hiai pupa  
tawndan kilawm leh nunzemawi  
takte zui in enton thak ni. Khristian  
gamtat kilawm tua sang a zang tam  
zaw thei ding in Toupa'n simtute  
hon vualzawl hen.

## VOCAL TRAINING

Kum 18 nuailamte a ding Vocal Training January 23, 2025 in Rayburn High, New Lamka ah Rev. G. Suanzalam, Coordinator (Ministries) in honkhiakna nei hi. Hiai vocal training ah mi 63 veel tel uhi. Kha thum sung, kalteng a Thohlehni leh Kiginni in class nei zel ding uhi. Lohching tak a zoh ahihna ding in thumsakni.



## NA ZINGCHIANG HUN PATHIAN PIA IN

- Hudson Taylor

*“Huaiziakin ka hon hilh ahi. Bang ne a, bang dawn a, bang silh a teeng ding chih thu ah na hinna uleh na sapum thu uah bangmah lunghimoh kei un. Nek ding sang in hinna a thupizaw kei a hia? Silh leh ten sang a sapum thupizaw hilou maw?” (Mathai 6:25)*  
*“Na lak ua kua ahia awlmoh ziak a ahin sung behlap zek thei?” (Mathai 6:27)*

Abraham kiang a Pathian a kilak lai tanchin i theihsa vek uh ahi ding. Pathian ahong kilak guih a, a khua leh a pa' inkuante a pan pawtsan a, a etsak gam lam a pai ding a hilh in a om hi. Hebrute 8:11 ah *“Huchi'n a paina ding lam leng theilou in a pawtkheta hi”* chih i mu hi. Hiai map omlou sapna tuh dawn hakpi ding ahi. Azotna ding, a paina ding kichiansa dimdiam a sap hileh bel a dan om hi. Himahleh zotna ding mun theihchian loupi a pawtkhiak kichi mihing a ding in thil haihuai ahi. Ahi, ginna tellou in haihuai mah ahi. Huai ahi, ginna tamsam mite'n a zingchiang hun uh, a maban uh Toupa pe khe ngam lou uhi. Na

zingchiang hun, na theihchet nai louh himahleh Toupa na piak ding, huai tuh ginna a kalsuanna ahi. Pathian' hehpihna a kingak a, a thugente gintak a, a hon kawkmuhna mun a i pai zel theih na ding in ginna a i ki ngak uh a poimoh hi. Huai ginna tuh Pathian' a kipumngakna genna ahi.

Abraham upat nung a sapna a tan lai in a inkuan a ding in khosak ding dan bangbang hiam geelsa ana nei tham ding hi. A geelsa in amah a ki gak sak kei a, a samtuh Pathian deihna lam a paikhiak ding poimoh a sa zaw hi. Pathian in ahon sapna plan na neihsa thilte ziakin na nawlkhin kha hiam? Abraham in



bel a zingchiang hun Pathian a pia a, a paina ding lam theiloupi in a zui hi. Kal a suankhe phot a, a pai zel a, a hun tak ah *“Hiai tuh nang leh na suante kiang a ka piak ding gam ahi”* chih hun a tun masiah ginna toh a pai nilouh hi.

Na zingchiang hun Pathian na piak khiak taktak ngam kei leh a vualzawlina kammalte na phukha thei kei ding hi. Na neek ding ah Pathian na gintak a ngai a, tuni na hohna ding leng ah Pathian mah a na kingak ding, na thil sai dek leng nang felna leh kua hiam panpihtu ding na neih hoih ziaak hizaw lou in, Pathian panpihna kia a sai zou ding na hi chih na muan ngam a ngai hi. Eite'n alom a hong tung noi-noi ding in i lam en ua, Pathian in bel ni khat zeel ah ahun lel in ahonpi a, eite'n tuni ahonpi ziaak a kipah huai ahihdan geel lou in zingchiang hun ding i malauh masa pah uhi.

Pathian muanna leh amah a kingakna i gen chiang in haksatna bei, mangbatna omlou, hauhsakna toh kidim hinkhua hipah lou hi. Na zingchiang hun Toupa pia in

chih omzia bel, kipahna ah Toupa tung a kipahdan thei, dahna tung a Toupa lemgeldan theisiam dia kipumngakna chihna ahi. Mi tamtakte'n haksatna a tuah uh thei siamlou in a ginna uh taimang san uhi. Abraham in Toupa gamchiam lam a zot lai in haksatna lou hinkhua nei ahi tuan kei, a thil phutkhakte lit huai pipi a om veve hi. Himahleh aman a zingchiang hun Toupa kiang a apiakkhiakna ah a bangkim pekhe khawm ahihmanin a haksatna tuahte ah Toupa va kigolh in sukvaiven pih zel zaw hi. A haksatnate Toupa'n a sukvaiven pih chiangin Toupa muan huaina chian semsem ahi leltak zaw hi. Huai ahi, na haksatna tuahte ah Toupa'n hon vualzoh pih ahi chih chian lechin Toupa na muanna khat khit khat ah ahong kibehlap ding hi.

Thumal dou hak mahmah khat tuh *“Kha leh!”* chih ahi. Ka bat din zou kei Kha leng, mite'n choh hon sa law kha leu, huihpi hong nung kha leh, khamkhop kei nei kei kha leh, nasep ding ki nei zou kei kha leh! Sum neih louh lai in ka inkuante

hong damlou kha leh! chihte'n mihingte hon zou mahmah hi. Jesu'n "*Na Pa uh van a om in na poimoh uh a thei*" a chih nung in "Kha leh!" ah i buai lailai uhi. Na buaina mi khempeuh na hilh ut khollouh hang in na muan deuh khat in hon thei henla, hon panpih mai leh chih na ut sek hi. Na gen louh a na buaina thei Pa, Pathian tuh bangkim neitu, siamtu ahi. Huai bangkim neitu in na buaina na gen louh lai in leng thei hi. A poimoh pen zaw huai bangkim neitu kiang a na zingchiang hun na piak khak louh sek pen ahi a poi!

Ei mihingte'n nunglam a thil i hih khelhsate ngaihdam nget pen i sep siam lam uh ahi a, himahleh i zingchiang hunte pen a bukim a Pathian pe lou in, ei deihdan a kaih i sawm nak uhi.

I malam hun a program i neihte, sep leh bawl ding i neihte Pathian kiang ah tangtung sak ding leh lohching sak ding in i ngen ua, himahleh ginna i tasam ua, Pathian ah i ki pumngak kei ua, mihing deihdan mah i paisak kha zel zawl

uhi. Ingaihtuah dan tak a thil a pai louh chiangin i heh ua, Pathian in hon dawng lou bang in i thazoi pah uhi. Pathian kiang ah i zingchiang hun pekhe vek in, amah ah kipumngak hilehang bel thil tung khat peuh ah i tawldam ding uhi. A vek a Pathian kiang a i ngak louh ziak ua tawl demdum kha nak i hi zaw uhi.

America gam a thugen minthang hi ding in zaw siam tungtuan a ngai, pil deuh a ngai, thil thupitak hih theih a ngai a chi sek ua, America nule-pa tamtakte'n mitungtuang suak ding in a tate uh nakpipi a anoh ua, khenkhat in a tate uh a noh bah daih zawmah uhi. Lohching ding leh a hoihpen dinmun luah sak tum in a theihna teng uh a zang uh, tha nakpi in a saal uhi. Mihing in pan i lak theih dan a lak ding mah ahihlai in naupangte zingchiang hun pen Pathian khut ah pe zaw in, ma lunghimoh lou in, Pathian khut a koih in lungmuang takin sinsak lehang naupang lungsim chidamlou tawm suak mahmah ding, mahni kikhailum, drugs hih tawm zou ding ahi. Toupa'n pha a sak bang in a

hih mai ding chih gingta kawm in i  
tate khamuang tak in sinsak ni.  
Zingchiang a ding awlmoh luat ziak  
a phiat velvul, lungkham luat kichi  
Pathian thu vai lou lua ahi.

Zan ihmu thei lou zen a “*Zing  
chiang bang ahong chi mah dia  
aw*” chia na ngaihtuah in bang a  
piangkhe sak a leh? Hiai ngaihtuah  
kik ni. Romete’n Sawltak Paul jail  
a akhum lai un aman bel saptuamte  
lehkha a khak in a hasuan hi. Jail  
sung ah phatna la sa in a lim emem  
mai uh ahikhka! Kha Siangthou in  
heen a om ding ahi chih ahilh lai in  
amailam a zuan veve hi. Sawltak  
Paul in a bangkim Toupa khut a nga  
hiven bang a lauh pih dia?

Danial, zehphi hetlou a Pathian zuitu  
tung ah haksatna a omlou tuan  
hetkei. Zuau a ngoh in a om a,  
Sakeibaknei kul a paih lut in a om  
hi. A zingchiang hun Toupa khut a  
nga loute’n hiai bang hun haksa ah  
complain a bawl uh. “*Bangziak  
a? Na na ka hoih sepsep maizen  
toh? Ka thuman za lou maw  
Toupa?*” chi in a complain uh.  
Danial in bel a tung a tung

bangbang a maituah a, a hun haksa  
tuahte tungtawn Pathian min  
thupina a hong kilang a, Danial  
Pathian tuh Pathian diktak ahi chia  
puanzak in a om hi. Pathian in  
nang tungtawn a banghiam thilthupi  
khat tup nei ahi chih na theihshiam  
kei leh na tung a thil tungte na vui  
pih ding hi. Na zingchiang hun  
Toupa tung a na ngak leh bang  
peuh na tuak zong in na vui kei  
ding hi.

Toupa en inla, Amah ah kinga inla,  
na zingchiang hun amah pia in,  
AMA’N A HIH VEK DING.

# UI VANGPHA

Nitaklam khat Donald Trump vakthoveng a Central Park a pawt, huihsiang dik a apaikual lai in gintakloupipi in Ui khat, German Shephard kichite gawng leh dengdal tak mai khat, singkung lianpu bul ah mu hi. Huai Ui tuh bang hiam lauthawng nei, gawng leh gil kial mahmah a om ahi hi.

Ui in Donald Trump banghiam lamet khat nei mah bang in en giaugiau zel ahihmanin Donald Trump in leng awl in naih hi. Himahleh huai Ui pen amah chauh hilou in a neitu khudoh, gitlough mel mahmah khat sing pang lehlam a pan hong dingkhia in, a Ui zep ek in, “**Manna bei**” chi in kou zialzial a, a Ui in lau mahmah hi. Donald Trump in “*Lawmpa aw hiai na Ui ahi hiam?*” chia a dotleh Ui neitupa’n “*Himah ei, nek ding lah zong mu lou, Ui manna bei khat aka*” chih toh pek ek thuah zawmah hi. Huchih lai in Trump Ui neitupa omdan leh a Ui entuah nilouh hi.

Atawp in Trump in “*Nang dia hiai Ui manna bei ahihleh, kei non pe mai diam?*” chi in kamdam tak in dong hi. Ui neitupa’n mak sa sim tak in “*Hiai ka Ui maw... na deih leh la aw. hilehle doller 500 hon pia aw*” chi hi. Trump in Ui mit a et Chiang in dahna, lungkhamna mu thei ahihman in hehpih huai sa in, bangtan hiam a ki ngaihtuah nung in huai Ui tuh a

leita hi. A ngaihtuahna ah hiai lemetna bei Ui in lametna nei thei ahi chih kiptak in pom hi. Ui neitupa’n “*Puakgik, na pu thak kiah pai aw*” chi in a Ui enghou lai hi.

Huchi in Trump in huai Ui gawng gingem tuh a inn lam uah paipih a, a nasemte’n mak sa in en heuhou uhi. Trump in a gari apan a

kumkhiakpih kawm in a nasemtute kiang ah hiai Ui min “*Lucky (Hampha) ahi*” chi hi. Huchi’n silsiang in, ann hoihtak piak ahihbanah Gan doctorte’n hoihtak in enkol uhi.

Huai Ui tuh a omna nuam mahmah himahleh hun paisa a athiltuahte ziakin lauhna nei in om khenkhuan lailai hi. Thawm banghiam a om zek chiang in kiguah in lau pahpah hi. Doctor siamte’n Trump kiang ah huai Ui pen nidang nakpipi a kisoisa ahihman a lauthawng tak a om den ahihdan genpih uhi. Trump in na theihtawp uh suah in pan hon la un, Ui manna bei hilou in, Ui manphatak i suah ding uh chi hi.

Himahleh hiai Ui in ann limchi taktak pe mahle-uh ne ngam lou in om hi. A tawp in Trump in a Ui kiang ah tu in pasalpha leh thuak hatte laibu khawng simsim sek hi. Huchibang a ni bangzah hiam ahihnung un, Nitaklam khat Lucky (Ui min) in Trump naih phei in, a pheitung ah a lu va nga beubau ngam hi. Huaitak in Trump in “Hmm.. i lohching ding, dohthei tak in kon enkol dia, i vualzou ding” chi in a lu khoih sak mialmial hi.

Tua bang a Trump in dohzoutak a a Ui a etkol nung in a Ui hong hangsan tou hiai-hiai in midangtung ah leng va bok ngam ta hi. Hiai Ui in damna a tan kia hilou in, Donald Trump ngei in leng a Ui etkolna akipan zilkhiak tampi nei in, huai in a hinkhua tampi bawlhoih zou chi uhi.

Trump in “*Mangbang khat dohtheih tak a i etkolna in eileng dohtheihna hon sinsak khawm a, i etkol a ding in lah damna ahi*” chi hi.

Ni khat Trump in thu a genna ah mikhat puanak sahtak silh khat va tel in, huai mipa’n a sakhau sawk sa in Trump naih hiai-hiai hi. Huchih laitakin Lucky (Trump Ui) in thakhat in huai mipa va boh in va soal hi. Mite’n a et demduam lai un huai Mipa sakhau apan Temta hong kia a, Trump thah sawm ana hi hi. Hiai ni in a Ui in Trump hinna humbit hi.

Mi hinna domkang inla, panpih in ni khat chiang in na panpih pen in nang ahon panpihd ing.



**REFORMED SCHOOL OF THEOLOGY (ReST)**

(Registered under the Manipur Societies Registration Act, 1989; No. 1 of 1990; No. 33 of 2019)  
 Office: Mata Village, New Lamka, Churachandpur, Manipur - 795006, INDIA  
 www.pcireformed.org | mobile no. +917085645785 | email: thanggualnam74@yahoo.co.in

*So that they might be with Him and He might send them out to preach (Mark 3:14)*

**A. Ministerial Foundation Course (M.F.C.). 8<sup>th</sup> Batch - 2025**

1. Lalsonglien	Thanlon PC	}	<b>Thanlon Presbytery</b>
2. Thanglalsong Gangte	Thanlon PC		
3. Douthianlal	Thanlon PC		
4. Chinngaihkim	Thanlon PC		
5. T. Sonsuanlian	Thanlon PC		
6. Khanlal	Tallian PC		

7. Ngaimuanching	Lungthul PC	}	<b>Singngat Presbytery</b>
8. Niangmuanhoih	Lungthul PC		
9. Pausuanlian Munsong	Bethany PC,		
10. James Lalkhenthang	Bethany PC,		
11. H. Lianmuankhai	Bethany PC,		
12. Gouneichong	Bethany PC,		
13. Kapminthang	Bethany PC,		
14. LK Lalbawi Khongsai	Bethany PC		
15. Liansuankhup	Bethany PC,		
16. Niangbiakkim	Tuivel PC		
17. Esther Chingngaih	Tuivel PC		
18. Zenkhansuan	Tuivel PC		
19. Haulalson	Enpum PC		

20. Suanliankhup	M. Salzang PC	}	<b>South Lamka Presbytery</b>
21. Chinglianvung	Mata PC		
22. Pauzagin	Mata PC		
23. Nenglam	Mata PC		
24. Nengneichong	Thingkangphai PC		
25. Chinbiakkim	Thingkangphai PC		
26. Jenny Lhingneithem	Gangpimual PC		
27. Mawiliansang	Gangpimual PC		
28. Lamneimoi	Gangpimual PC		
29. M. Ginsuanmung	Gangpimual PC		
30. Ginlianmung	Gangpimual PC		
31. Nianglunmawi	Gangpimual PC		
32. Regina Chongpi	Gangpimual PC		
33. Haungailun	Gangpimual PC		
34. Esther Kimngaihlian	Gangpimual PC		
35. Mungginlian	Gangpimual PC		
36. Sankim	Gangpimual PC		
37. Khaisuanthang	Gangpimual PC		
38. Chingkhannem	Gangpimual PC		
39. Ningbiakmawi	Gangpimual PC		

Contd.

**B. Ministry Enrichment Program (M.E.P.) - 2025**

- |                          |                |   |                               |
|--------------------------|----------------|---|-------------------------------|
| 1. Nenglunmang           | Mualkoi PC     | } | <b>South Lamka Presbytery</b> |
| 2. S. Khamminthang       | Mualkoi PC     |   |                               |
| 3. Robert M. Thangminlun | Gangpimual PC  |   |                               |
| 4. Zamkhanlun Naulak     | Mata PC        |   |                               |
| 5. Dalsianmung           | Thingkangphai  |   |                               |
| 6. Khaisuanlal           | Rayburn PC     | } | <b>Lamka Presbytery</b>       |
| 7. Manbiakmawi           | Goshenzaang PC |   |                               |
| 8. Dea. K. Lamkhanmuan   | Goshenzaang PC |   |                               |
| 9. Thangsuanmuan Naulak  | Engedi PC      |   |                               |
| 10. Mangminthang         | Engedi PC      |   |                               |
| 11. Khamlunmung          | ZPCS           |   |                               |
| 12. Paulamthang          | ZPCS           |   |                               |

**C. Bachelor of Theology (B.Th.) - 2025**

- |                |            |
|----------------|------------|
| 1. Kamkhanmung | Zenhang PC |
|----------------|------------|

**D. Master of Divinity (M.Div.) - 2025**

- |                    |            |
|--------------------|------------|
| 1. P. Khamlianmung | Daizang PC |
|--------------------|------------|

(REV. DR. G. PAU MUANTHANG)  
PRINCIPAL ReST

**TANCHIN ZAKSAKNA**

Tawplou a hon thumpih gige nahi uh chih ka theih ziak in kipahlua ing.

#January 17, 2025 ni in **MTh Thesis** ka na submitta, kipahtu gen ni.

**MABAN VAL:**  
 February 05 - Farewell Night  
 February 10-15 - Final Exam  
 February 17 - Missions Seminar  
 February 18 - Baccalaureate  
 February 19 - Graduation

Thumna ah hon phawk zom un aw!  
**From: Rev. H. Thiankhanmuan**  
 IBTS, Kottayam



- Feb. 01 : Kha thak hon musak Pathian kiang ah kipahthu genni. Tukha thupi “Gam leh nam adia thumna” gahsuah tak a i zat na ding un thum ni.
- Feb. 02 : Tuni in Sunday School kipanta ding hi. Zil manpha, khalam leh salam a i khanpih chiat na ding un thumna nei in, mahni local chiat a sinsaktu dingte thumsakni.
- Feb. 03 : Tuni in i saptuam nuai a Village Schoolte kai pan nawnta ding uhi. Semtute leh naupangte a ding in thumsakni.
- Feb. 04 : Tuni in Meitei Khristian galtaite phawkkikni. Amaute tuni tanin a ginna uh lenkip in, khosak haksatakin khosa uhi.
- Feb. 05 : Tukha a Birthday neite a ding in thumsakni. Damsawtna leh sa leh kha a vualzawlna ngetsakni.
- Feb. 06 : Tuni in Meitei Mission Field a seem Pastor Kumarjit leh a inkuante thumsakni. A kep meitei Christiante adia khalam ann vaktu hoihtak a suah seem na ding in thumni.
- Feb. 07 : Tuni in Assam Mission Field a seem Elder Nialthangzo leh a inkuante thumsakni. Khamangthang tam seem a mat na ding un thumni.
- Feb. 08 : Tuni in Assam Mision Field a seem Evan. Hemanta Rahang leh a inkuante thumsakni.
- Feb. 09 : Tuni Zomi National Day of Prayer ahi. Zosuante kigawmna ding, kivaihawm siamte hihna ding leh gam leh nam a ding in thumni.
- Feb. 10 : Tuni in Lianzamuam leh a inkuante, Tinigharia, Assam a Missionary seemte a ding thumni.



- Feb. 11 : Tuni in Kimngaihlian, Jorhat a Missionary nna sem a ding in thumni. Gahsuah tak a hon sep zom theih na ding in.
- Feb. 12 : Tuni in Mrs. Zamdonching, IEM tungtawn a Missionary i chawm uh ahi. Amah leh a inkuante a ding in thumni.
- Feb. 13 : Evan Lamkhanmang Tonsing leh a inkuante a ding thumni. Amah IEM tungtawn Missionary i chawm uh ahi.
- Feb. 14 : Pastor Jamminthang leh a inkuante a ding in thumni. Amah IEM tungtawn a Missionary i chawm uh ahi.
- Feb. 15 : Evan. Tongkholen Touthang leh a Inkuante a ding in thumni. Amah IEM tungtawn a Missionary i chawm uh ahi.
- Feb. 16 : Evan. Thangvansang leh a inkuante a ding in thumni. Amah FMPB tungtawn a Lamka lak a Missionary nasem a om ahi.
- Feb. 17 : Evan Thangminlun leh Zamngaihshiamte nupa leh a tate ua ding in thumni. HIM Ministry tungtawn i chawm uh ahi.
- Feb. 18 : Samuel Tamang leh a inkuante a ding in thumni. HIM tungtawn a missionary i support i piak uh ahi.
- Feb. 19 : Evan Kending Kumbang leh a inkuante a ding in thumni. HIM tungtawn a missionary i support uh ahi.
- Feb. 20 : Tuni Zomi Namni ahi. I gam Politics dinmun toh kisai thumna in nei ni. Kivaihawmna i neih theih na ding in thumni.
- Feb. 21 : Mrs. Vungngaihlan leh Evan. ST Soigoulunte inkuan a ding in thumni. MVM tungtawn a Missionary i chawm uh ahi.
- Feb. 22 : Mr. Ginlianmang leh a inkuante a ding in thumni. Amah Teddim Synod tungtawn a Toupa nasem i support uh ahi.
- Feb. 23 : Mr. Khenzakhup leh a inkuante a ding in thumni. Amah Teddim Synod tungtawn a Toupa nasem i support uh ahi.

- Feb. 24 : President Donald Trump leh a vaihawm uliante a ding in thumsakni. Vaihawmna dik, diktatna leh khovel a Khristiante a ding a khamuantu hoih ahong hihna ding un.
- Feb. 25 : Tuni in Mercy Manlianvung leh a Inkuante, Guwahati a Toupa nna seemte a ding in thumni.
- Feb. 26 : Evan Baneshwer leh a inkuante a ding in thumni. Gospel for India tungtawn Nepalite lak a seem, i support uh ahi.
- Feb. 27 : Tuni C. Tuiveljang ah March 6-9, 2025 chiang in chialpi om ding toh kisai gahsuh tak a aneih na ding un thumni. Thugentu Evan. N. Thangkhansiam hi ding hi.
- Feb. 28 : Kha tawp tan hon musak Toupa kiang ah kipahtu genni. Amah pina leh makaihna khat leh khat ki ngetsak in i kim i kiang a mite leng thumsakni.

## BUKPI PC HOTDAMNA CHIALPI

Bukpi PC ah Bialtu Pastor malakna in Jan. 9-12, 2025 sung chialpi neih ahi. Hiai hun ah Thugentu in Rev. G Suanzalam leh Seminar Latu in Mrs. Rithanglian Tombing pang uhi. Hiai camp leh Seminar lohching tak a zoh ahi. Thumna ah Bukpите phawk zuini.





### RAYBURN SAPTUAM IN CONFIRMATION CAMP ReST AH NEI

I saptuam paidan ua poimoh mahmah lah a tamzawten i ngaihsak khollouh uh Naupang Sunday School apan piching lut dingte "*Confirmation Class*" neihpih ahi. Rayburn saptuam in kumteng in hihthei zel uh ahihmanin i kipahpih mahmah hi. Local chih a dia haksa ahih leh leng Presbytery Superintendent saina in Presbytery ah hihtheih leh. Ahihkeileh Pastor in amah local ahihkeileh a bial sungteng ah saikhawm dan omthei leh hoih mahmah ding.



### PRESBYTERIAN MISSIONS FELLOWSHIP HEAD QUARTER HEUTU THAKTE

Rev. (Rtd) TS Thangta (Chairman) Elder TK Mung (Vice Chairman)  
Rev M. Thangkhanmuan (Secretary) Elder S. Khamminthang (Asst.  
Rec. Secy.) Amaute na gotna leh thumsakna January 21, 2025 in Rev.  
G. Suanzalam, Coordinator (Mins) in zang hi.

If undelivered, please return to:

The Editor  
PCI Messenger  
P.O. Box-32, Presbyterian Church in India (Reformed)  
Head office : New Lanka (H) 795006  
Manipur, INDIA

**BOOK POST**

To:

---

---

---



January 13, 2025 in Rev. M.Thangkhanmuan, Coordinator (I&M) in thumna nei in Golden Jubilee building construction pat hita.

